



Tai dîs di campagne eletorâl pes votazions regionâls 2015, stomeât di fami savoltâ il stomi a sintî i politics intai pulinârs de television, mi soi metût a lei un saç in marilenghe di Giovanni Pillinini ch'al fevele de vite e de opare di un grant om furlan, vivût un grum di agns indaûr (1622 - 1692), ma ch'al somee ancjemò presint te nestre ete. Un om di grande esperience e savê, fats in tes corts de famee dai Medici in Toscane, daspò te Republiche Serenissime di Vignesie, e a la fin a Viene te cort de Cjase Imperiâl, cence contâ che de vite militâr te vuere dai Trente Agns. Bon, daspò il so ritîr tal ricet di Guriz di Cjamins dongje Codroip, Ermes di Colorêt al à vût mût di tornâ parsore des sôs esperiencis, e il so judizi sul mont dai sorestants e sul lôr mût di guviernâ e aministrâ al è une vore critic, tant che ta un dai siei sonets, si sâ che Ermes al è stât un grant poete, ai risierve la quartine chi sot:

*Ognun fevele ben, opare mâl
ognun la vûl cuinçâ e plui la romp
e il grop dal mâl guviar è tant insomp
ch'a no lul cuince plui vueli né sâl*

E a no son nome i politics e aministradôrs dal timp a no plasêi, parcè che ancje i miedis e i

farmaciscj a colin sot la sô manarie, bastè dai une lete aes dôs cuartinis chi sot:

*And'è cu no cognôs né onzint né jarbe
e pretindin di vuarî cual si sei mâl
e, cjaminant cun pas pontificâl,
stimin che il medeâ al stei te barbe.*

*Vadi la spezierie dute in malore
sirops, aghis, cordiai e confezions,
pirulis, pitareçs, cassie in bocons
l'è chel cu fâs mûri denant da l'ore.*

A us domandi se a us somee che lis nainis e sedin cambiadis daspò cuasi cuatricent agns. A no zonti nuie altri, dome il gno parè: la rispueste e je SI, ma in piês!

di Bepi Zefon

